
Eth conselhèr de Salut e era sindica d'Aran presidissen era signatura deth nau convèni de colaboracion entre Salut e eth Conselh Generau d'Aran en matèria de sanitat

- **Er acòrd renauís eth marc institucionau de coordinacion entre CatSalut e eth Serviç Aranés de Benèster e Salut entà qu'Aran pogue contunhar exercint es sues competències en matèria de sanitat, en colaboracion damb eth Departament de Salut**

Eth conselhèr de Salut, Josep Maria Argimon, e era sindica d'Aran, Maria Vergés, an signat aguest maitin eth nau convèni entre eth Departament de Salut e eth Conselh Generau d'Aran entara coordinacion deth sistèma public de salut en Aran, territòri qu'a es competències en matèria de salut transferides. Eth document establís eth marc de colaboracion entre eth CatSalut e eth Serviç Aranés de Benèster e Salut (SABS), adaptat ar scenari normatiu actuau, en substitucion deth convèni de 2006, que perdec era sua vigèncià on octubre de 2020.

Eth conselhèr a explicat que se tracte d'un "convèni marc que dempús se va actualizant damb es diferents addendes entà cada naua accion a on, ath delà, i a totes es alianças estrategiquas que se mantien, des de centres espitalaris, ath Serviç d'Emergències Mediques damb qui signèrem ara hè pògues setmanes, passant per Hospital del Mar, er Hospital de Vall d'Hebron o d'altres institucions pròpies dera Generalitat, que seguiràn existint e augmentant".

Argimon a valorat positivament era apòsta present e futura dera "atencion d'integracion social e de salut en Aran". En aguest sentit a rebrembat que "impulsam era Agència Integrada Social e Sanitària pr'amor qu'es besonhs de salut d'ua persona no comencen e acaben un dia e ath dia següent comencen es besonhs socials, senon qu'ei un contínuum".

Peth sòn costat, Vergés s'a mostrat plan satisfèta deth renauiment d'aguest convèni e a explicat que çò que hè eth document éi "balhar-mos eth marc juridic deth traspàs dera competèncià entà qu'Aran pogue gestionar era sua sanitat de manèra autonòma, evidentament dera man deth Departament de Salut a trauès dera Region Sanitària Naut Pirenèu e Aran". Ath delà, a hijut que "mos mèrque ua huelha de rota en d'altres qüestions coma son trabalhar enes airus dera salut mental o era salut publica, enes quaus Aran tanben a es competències".

Gabinet de Comunicació i Premsa

Eth 7 d'abriu de 2006, era Generalitat de Catalunya e eth Conselh Generau d'Aran formalizèren un prumèr conveni de colaboracion de desenvolupament deth Decrèt 354/2001, de 18 de deseme, que regule era transferència de competéncies dera Generalitat de Catalunya ath Conselh Generau d'Aran en matèria de sanitat, damb era finalitat de facilitar-ne era aplicacion e fixar un mecanisme de relacion practic, flexible e estable entà coordinar es sues actuacions.

Vielha, diuendres 6 de mai de 2022